

ZORTZIKOA

1/ Adiskide anaitu
tertulia-koak,
gal ez ditezen festa
Iñauterikoak,
berri bat egiteko
dituzte asmoak,
gizon eta galayak
Donostiakoak.

2/ Lasturdik ekarriak
aukeran sei zezen,
bi iru urtekoak
jokatzeko emen:
orain arte Plazara
ez diranak irten,
Iñauteri festetan
illko dira aurten.

3/ Igande, astearte
bi arratsaldetan,
dira zezenak aurten
Iñauterietan:
bola zurezkoakin
adar zorrotzetan,
toliatzalle inork
miñik ar ez dezan.

4/ Aurten beti bezela
aundizkirakoak
dira Iñaute festa
Donostiakoak:
jendez guztiz beteak
bazter plazakoak,
doarik ikusteko
zezen illtzeakoak

5/ Lendanaz apaindurik
erara jarria,
dago Plaza ederki
barreraz itxia:
eser-leku luzea
algaindu josia,
aukerakoa eta
guztiz egokia.

6/ Festagille guztiak
dira errikoak,
pikadore, ezpata,
banderilleroak:
egokiak dituzte
jantzi soñekoak,
ala zaldi gañeko
nola oñezkoak.

7/ Plaza zaldunak ere
dira bertakoak,
aguazil nagusiak,
baita mazeroak:
Plazaren alaigarri
zaldi antzekoak,
ate-zai, soñulari
eta zortzikoak.

8/ Beti nai izan oi det
laburtxo gelditu,
ez kanta luzeakin
jendea nagartu:
aitormen au egiñik
ez iñor gogaitu,
aditzalle maiteak,
guztiok barkatu.